



KOPI PAHIT

Di ibu kota Persekutuan Tanah Melayu telah heboh terdengar berita-berita angin akan langkah-langkah yang bakal dijalankan oleh UMNO terhadap Harian Majlis di Kuala Lumpur yang banyak mengeluarkan kritik-kritik kepada UMNO. Langkah yang bakal dijalankan kononnya ialah serupa dengan perbuatannya kepada Qalam dan Warta tempoh hari iaitu "Majlis" akan diarak dan dibakar di dalam suatu istiadat jika benar berita ini sesungguhnya langkah ini "patut" dijalankan oleh UMNO kerana adalah suatu kelaziman untuk mentakrifkan kebebasan menulis itu ialah kebebasan yang yang sefahaman dengan awak sahaja. Orang-orang akan menunggu sejarah yang kedua itu berlaku lagi.

* * *

Di Majlis Persidangan Federal tatkala dibahas perkara yang mengenai perasmian Bahasa Melayu A. Sa' don Zubir Ketua Perikatan Pemuda UMNO telah menyokong anjuran Cif Sekretari supaya dibiarkan sahaja nanti dengan keadaan yang menentukan yakni- biarkan sahaja sehingga ditentukan oleh masa atau dengan lebih terang supaya biar bahasa Inggeris jadi bahasa rasmi ataupun Bahasa Mandarin! Di sebalik itu ia berkata bahawa ia tidak akan khianat kepada bangsa Melayu! Syabas tetapi apakah bahasa itu tidak salah satu perjuangan yang diperjuangkan oleh umat Melayu?

* * *

Syabas Parti Negara yang telah membawa Bahasa Melayu sehingga jadi bahasa kebangsaan! Yang demikian dikuatkan pula dengan Tuan Abdullah pun (daripada orang India) ahli Parti Negara telah bercakap di majlis itu dengan Bahasa Melayu! Ini satu kejayaan tetapi mesti terus

diperjuangkan iaitu mestilah diakui sebagai bahasa rasmi maka hendaklah juga sekolah-sekolah kebangsaan itu bahasa perantaraan Bahasa Melayu. Tuan Sa'don harus bilang tidak boleh maju! Betulkah begitu?

* * *

Bahasa Melayu boleh dijadikan bahasa pengajaran! Buktinya lihat di Indonesia iaitu sehingga ke universiti bahasa itu menjadi bahasa perantaraan- bahasa yang utama dan cukup membawa kemajuan. Yang sebenarnya kemajuan Bahasa Melayu itu terhalang tidak lain sebabnya ialah adanya penjajahan jadi ia bersama-sama dijajah dan disebabkan oleh kurang penghargaan bangsa sendiri. Tak percaya cuba siasat.

* * *

Seorang sahabat menarik perhatian saya tentang perkataan yang digunakan oleh Perikatan UMNO-MCA tentang persidangan yang selalu disebut Persidangan Kebangsaan Perikatan. Katanya di situ disebut perkataan kebangsaan- apa kebangsaannya Malayankah atau Sinumalikah. Saya tak dapat jawab kerana saya tahu kalau perjuangan Melayu maka perjuangannya ialah kebangsaan Melayu sedang Yang di-Pertua UMNO sendiri dikatakan hanya mengakui Melayu itu sebagai kaum sahaja. Jawab kepada yang tersebut tentulah dapat dijawab oleh UMNO sendiri- sedang kongres pemuda sekarang terang-terang mengisyiharkan-bangsa Melayu, Bahasa Melayu dan Negara Melayu.

* * *

UMNO telah mengeluarkan kenyataan meminta cawangan-cawangannya sebanyak 800 buah berusaha mengadakan pelajaran Bahasa Melayu kepada orang-orang yang bukan Melayu- ini bagus! Tetapi berhubung dengan UMNO dahulunya dikatakan tertinggal di dalam usaha merasmikan Bahasa Melayu maka langkah atau isytihar ini dipandang oleh sebahagian pihak tidak lain cuba hendak menutup kekalahan itu- adakah yang demikian itu betul?

-Cemeti al-Farouk